

Representanten **Tom Hiis Bergh (V)** stilte følgjande spørsmål til hovudutvalet:

1. Vil fylkeskommunen i likhet med Bergen kommune dispensere fra 3-metersregelen der det etter en konkret helhetsvurdering er forsvarlig?
2. Vil fylkeskommunen være positiv til å flytte skilt og hindringer på fylkeskommunale veier der det er fornuftig for å tilrettelegge for at serveringsstedene skal kunne utvide sine uteserveringer?
3. Vil fylkeskommunen i fremtiden sørge for at også NÆRNA inkluderes når saker som gjelder uteservering skal behandles i fylket?

Fylkesdirektør innovasjon og næringsutvikling har ved fylkesdirektør infrastruktur og veg svart følgjande:

Spørsmål 1:

Utgangspunktet er at kommunen gjennom kommunedelplan sentrum (KDP Sentrum) har fastsett gjeldande føreseger og retningslinjer for arealbruk som må ligge til grunn også for utleige av fylkeskommunal gategrunn til uteservering og andre aktivitetar.

Det er kommunen som plan- og byggesaksmyndigheit som må gi dispensasjon for at me skal kunne gi løyve til utvida skjenkeareal på kostnad av ferdselsarealet til dei gåande og eventuelt annan arealbruk. Fylkesdirektøren har retta ein førespurnad til Bergen kommune om me kan legge til grunn same tolking som byrådet har gjort i saka som gjeld uteservering på Bryggen i 2021 som eit unntaksår.

Fylkesdirektøren legg vekt på at det på generelt grunnlag er viktig at fylkeskommunen og kommunen har ein mest mogleg lik praksis i handsaminga og oppfølginga av uteserveringssakene. Dei næringsdrivande bør oppleve at dei møter dei same vilkåra, uavhengig av vegeigar. Samstundes vil forholde og føresetnadane for å gi utvida skjenkeareal vera forskjellig ulike stader i byen. Det er ulik fortausbreidde å ta av, skilnadar i kor høg bil- og fotgjengartrafikk det er og skilnadar i tilleggsaktivitetar og -funksjonar som krev areal av fortauet. Fylkesdirektøren forstår bakgrunnen for byrådsvedtaket og vil i dei einskilde sakene gjera ei konkret vurdering om det vil vera forsvarleg å redusera fritt fortausareal.

Fylkesdirektøren er ikkje samd i at me legg til grunn ei strengare tolking av arealkrava i KDP Sentrum enn kva som har vore praktisert tidlegare. Fylkeskommunen har vidareført dei seinare års praksis etter at me overtok ansvaret for handsaming av søknadane om uteservering langs fylkesveg frå 2020. Det vart gjort innstrammingar for serveringsstader på Torget og Bryggesporden i 2019 etter føringar frå Bergen kommune, medan ordninga var forvalta av Statens vegvesen. Andre innstrammingar vart gjort tidlegare.

Det kan vera enkeltsaker der andre moment spelar inn for at søkjarar har opplevd redusert areal til uteservering seinare år. I ei konkret sak for årets sesong har fylkesdirektøren gitt medhald til klage frå ein serveringsstad i Vaskerelven (Café Opera).

Fylkesdirektøren har vidare stor forståing for at søkjarar har ønskt å koma i dialog med fylkeskommunen om sakene sine. Fylkesdirektøren inviterte alle søkjarar til møte onsdag 21. april. Her deltok også relevante bransjeorganisasjonar. I etterkant av møtet vert dei som ønskjer det fylgt opp med eigne møte om deira saker.

Spørsmål 2:

Det er Statens vegvesen som har skiltmynde, også på fylkesveg. Dersom eit skilt skal verta flytta må det gjennom ei vurdering i kvar enkelt sak. Skilt er plassert etter ei grundig fagleg vurdering av trafikktryggleiksomsyn. Trafikktryggleiken vil ligga til grunn som viktigaste omsyn også ved nye vurderingar av etablerte skilt. Statens vegvesen har i tidlegare sak vore negativ til å flytte skilt i ei konkret sak av desse omsyna.

Spørsmål 3:

Fylkesdirektøren vil syta for at framtidige referatsaker og politiske saker som gjeld uteservering langs fylkesveg også vert lagt fram for hovudutval for næring der dette er naturleg. Slike saker vil

også verta lagt fram for rådet for menneske med nedsett funksjonsevne (RMNF) og hovudutval for samferdsel og mobilitet (SAMO). Om ønskeleg kan fylkesdirektøren orientera utvalet om arbeidet med uteservering. Fylkesdirektøren vil leggja til at avdeling for infrastruktur og veg og avdeling for innovasjon og næring har ein etablert og god dialog seg i mellom, og at uteservering er eit naturleg tema inn i denne dialogen.